

Fimmtudaginn 29. maí 1986.

Nr. 160/1986. **Ákærvaldið**

gegn

Björgólfi Guðmundssyni.

Kærumál. Gæsluvarðhald.

Dómur Hæstaréttar.

Mál þetta dæma hæstaréttardómararnir Halldór Þorbjörnsson, Guðmundur Jónsson og Guðmundur Skaftason.

Varnaraðili hefur skv. heimild í 3. tl. 172. gr. laga nr. 74/1974 skotið hinum kærða úrskurði til Hæstaréttar með kæru 21. þ.m. er barst Hæstarétti 23. þ.m. Krefst hann þess að úrskurðurinn verði úr gildi felldur en til vara að gæsluvarðhaldstími verði stytur. Þá krefst hann kærumálskostnaðar. Af hálfu ákærvalds er þess krafist að úrskurðurinn verði staðfestur.

Svo sem greinir í hinum kærða úrskurði er rökstuddur grunur á að varnaraðili kunni að hafa framið brot er varðað geta fangelsi. Þá ber einnig að fallast á að nauðsyn hafi verið á því skv. 1. tl. 67. gr. laga nr. 74/1974 að koma í veg fyrir að varnaraðili gæti torveldað rannsókn málsins, svo sem með því að bera sig saman við meðkærðu og aðra. Þykir mega staðfesta úrskurðinn, þó með þeirri breytingu að gæsluvarðhald varnaraðila skuli standa til miðvikudagsins 11. júní nk.

Kærumálskostnaður verður ekki dæmdur.

D ó m s o r ð :

Hinn kærði úrskurður er staðfestur með þeirri breytingu að gæsluvarðhald varnaraðila, Björgólfs Guðmundssonar, standi til miðvikudagsins 11. júní nk. kl. 17:00.

Úrskurður sakadóms Reykjavíkur 21. maí 1986.

Ár 1986, miðvikudaginn 21. maí er á dómþingi sakadóms Reykjavíkur, sem háð er í Borgartúni 7 af Hirti O. Aðalsteinssyni fulltrúa, kveðinn upp úrskurður þessi.

RLR hefur gert þá kröfu að kærða, Björgólfi Guðmundssyni, fæddum

2 janúar 1941, Hofsvallagötu 1 hér í borg verði með úrskurði gert að sæta gæsluvarðhaldi allt til miðvikudagsins 25. júní nk. kl. 17:00 vegna gruns um brot gegn XVII. og XXVI. kafla almennra hegningarlaga.

Kærði hefur mótmælt kröfunni.

Með úrskurði skiptaréttar Reykjavíkur uppkveðnum þann 6. desember sl. var bú Hafskips h/f, Reykjavík, tekið til gjaldprotaskipta. Þann 6. maí sl. barst ríkissaksóknara rannsókn skiptaréttar Reykjavíkur á gjaldþroti fyrirtækisins, sbr. 88. gr. 4. tl. gjaldprotaskiptalaga nr. 6/1978. Með bréfi dagsettu 7. maí sl. gaf ríkissaksóknari Rannsóknarlögreglu ríkisins fyrir-mæli um umfangsmikla rannsókn á ætluðum brotum forráðamanna og starfsmanna Hafskips h/f og Útvegsbanka Íslands gegn XIV., XV., XVII. og XXVI. kafla almennra hegningarlaga.

Í ítarlegri skýrslu skiptaráðanda eru raktar grunsemdir um stórfellt misferli forráðamanna og starfsmanna Hafskips h/f og skyldi rannsóknin m.a. beinast að eftirfarandi:

- A. Ætluðum brotum tengdum reikningsskilum og áætlanagerð.
- B. Ætluðum brotum er tengjast verðmætamati eigna.
- C. Ætluðum brotum tengdum hlaupareikningum í vörslum forráðamanna Hafskips h/f.

Leikur grunur á því að á árinu 1984 hafi verið útbúnir uppgjørsreikningar mismunandi efnis, annars vegar handa forráðamönnum félagsins og hins vegar handa öðrum, þar á meðal Útvegsbanka Íslands. Virðist niðurstaða svokallaðs milliuppgjørs hafa verið vísvitandi rangfærð og síðan hagnýtt félaginu til hagsbóta.

Einnig leikur grunur á því að forráðamenn Hafskips h/f hafi vakið og hagnýtt sér rangar hugmyndir forráðamanna Útvegsbanka Íslands um verðgildi veðsettra eigna félagsins. Liggur fyrir að á hefur vantað allt að kr. 170.000.000,00 til þess að markaðsverð skipa félagsins stæði undir veðskuldbindingum.

Þá þykir ástæða til að ætla að forráðamenn Hafskips h/f hafi misfarið verulega með sérstaka hlaupareikninga sem voru á nafni félagsins en í vörslu þeirra.

Auk framangreinds er rannsókninni ætlað að taka til ætlaðra brota vegna bifreiðakaupa, veitingar afsláttar og eftirgjafar flutningskrafna, greiðslu ferðakostnaðar, greiðslna til kærða o.fl.

Kærði hóf störf hjá Hafskipi h/f frá 1. desember 1977 sem framkvæmdastjóri en frá miðju ári 1983 tók kærði við starfi forstjóra félagsins. Við yfirheyrslur hjá RLR hefur kærði talið að staðið hafi verið eðlilega að veðsetningum eigna fyrirtækisins, en málefni þessi hafi átt undir aðra starfs-

menn. Þá er framburður kærða óljós í veigamiklum atriðum og stangast á við skýrslur annarra forráðamanna fyrirtækisins.

RLR gerði í gær kröfu um gæsluvarðhald á hendur 5 öðrum mönnum í tengslum við mál þetta. Einn þeirra hefur við yfirheyrslur hjá RLR kannast við að forsvarsmenn félagsins hafi visvitandi rangfært reikningsuppgjör félagsins og jafnframt sammælt um rangan framburð fyrir skiptarétti.

Með hliðsjón af því að framundan er umfangsmikil lögreglurannsókn á stórfelldu fjármálamisferli í tengslum við umrætt gjaldþrot þykir með hliðsjón af framansögðu og með vísan til 1. tl. 1. mgr. 67. gr. laga nr. 74, 1974 rétt að taka kröfu RLR til greina og skal kærði sæta gæsluvarðhaldi allt til miðvikudagsins 25. júní 1986 kl. 17:00.

Ú r s k u r ð a r o r ð:

Kærði, Björgólfur Guðmundsson, skal sæta gæsluvarðhaldi allt til miðvikudagsins 25. júní 1986 kl. 17:00.

Fimmtudaginn 29. maí 1986.

Nr. 161/1986. **Ákæruvaldið**

gegn

Helga Magnússyni

Kærumál. Gæsluvarðhald.

Dómur Hæstaréttar.

Mál þetta dæma hæstaréttardómararnir Halldór Þorbjörnsson, Guðmundur Jónsson og Guðmundur Skaftason.

Varnaraðili hefur með heimild í 3. tl. 172. gr. laga nr. 74/1974 skotið hinum kærða úrskurði til Hæstaréttar með kæru 22. þ.m. er barst Hæstarétti næsta dag. Krefst hann þess að úrskurðurinn verði úr gildi felldur en til vara að gæsluvarðhaldstími verði stytur. Þá krefst hann kærumálskostnaðar. Af hálfu ákæruvalds er þess krafist að úrskurðurinn verði staðfestur.